

INUUT ATAQATIGIIT

INATSISARTUNI



UKA 2013/25

13. september 2013

Juliane Henningsen

Kalaallit Nunaanni imminoortarnernik nuna tamakkerlugu pinaveersaartitsinermut periusissiaq 2013-2019

(Peqqissutsumut Attaveqarnermullu Naalakkersuisoq)

Inuuneq erlinnartoq tamatta nuannersumik, anguniagaqarfiusumik asanninnermillu aallaavilik pigerusupparput.

Ataqeqatigiilluta, nunaqqatigiilluta susassareqatigiittut kivitassaraavut sanngiiffigisavut, nukippullu iluamik siunertalimmillu atorutsigu upperaarput angusassagut killeqanngitsut.

Akisussaaffik oqaasiuvoq pingaarutilik. Akisussaaqatigiinneq taamatulli.

Imminut toquuttarnerup akiorneqarnissaanut periusissiaq nutaaq oqaluuserineqalerpoq, uanilu periusissiami allorassaaqatigiinnissarput qitiussaaq.

Alianartaqaaq, annasarlu oqaasinngortikkuminaattarpoq ilaquaasunut, ikinngutaasunut, qanigisaasunullu imminut touttoqartillugu.

Taamatulli alianartigaaq, nunatsinni imminut touttoqartarnera nalinginnaasunngorsimammat, allaallu inooqatigiit ilaqtariillu akornanni kamaattoqartillugu imminornissamik sioorasaarisarneq atugaasupilussuulluni, tamanna akuerineqarsinnaanngilaq. Inuaqatigiittut ilikkartariaqarparput ikioqquneq, qanorlu misiginermik oqaasinngortitsineq. Kiisalu peqatigiittarnitsinni nuannersuinnarnut oqittuinnarnut inissaqartitsinnginnissarput. Aliasunneq kamannerlu oqaasinngortinnejaraangami pitsaanerpaavoq.

Taamaammat oqaluuserisaq una imaannaanngitsuuvoq, maanngaannillu alianartunik inuunerup sinnerani ikilerneqataasumik nalaataqarsimasut misiginneqatigalugit oqaatigeqqaarusupparput.

Periusissiussagutta nutaamik, pingaarnerpaavoq piaartumik tigussaasumik pilersaaruteqarnissarput.

Suliniutit qulit saqqummiunneqartut soqutiginarpu ilaatigut; eqqarsartaatsikkut peqqissuunissaq, navianaataasinjaasunik aaqqissuussamik nalunaarsuisoqarnissa, ilisimatusarnikkut toqqammavilersuineq nukittunerusoq allallu ilaatigut suliniutinik ataqtigissaarinermut tunngassuteqartut.

Suliniutit pingaarutillit saqqummiunneqarput, pitsasumillu kinguneqaqqunaqaat. Nukinnik annertusaaneq – Naalakkersuisut akissutissaqartittariaqarpaat. Pilersaarut ersarissuusariaqarpoq.

Anguaniagaavormi imminoortartut imminoortartullu ikilisinneqarnissaat.

Ilisimavarput inuttut atukanik nalaatanillu qaangeruminaatsunik patsiseqartartut – imminoornissamik eqqarsaateqartarneq imminoortarnerlu. Ilaatigut isumaqalertoqartarpoq inuit imminut toquttartut tassaasut eqqarsartaatsimikkut tarnimikkullu nappaatillit. Taamaattumik paasiuminaatsipparput imminoortarnernik nuna tamakkerlugu suliniutit pillugit qitiusoqarfik peqqinnissaqarfiup ataani tarnikkut nappaatilinnut sullissiviit ataannut

ilineqarsimammatt? Uanimi suliassaqarfik pineqartoq nappaatinut tunngassuteqanngilaq. Akerlianimm meeraanermi angerlarsimaffimm imigassamik atornerluisoqarnera Kinguaassiutitigull innarligaaneq imminut toqunnermut attuumassuteqartut paasineqarpoq. Inuttut iluitsutut inerissimaneq, timikkut, eqqarsartaatsikkullu inerisimalluarnissaq tamatta isumagisariaqarparput.

Nukittorsarneq – tarnikkut nukittorsarneq aamma atuarfinni sammineqartaleriaqarpoq. Ilinniarfennilu tamani. Atuarfitsialammilu inuttut ineriantornermik sammisaqartitsisarneq aallartiffiulluqarpoq.

Tamatulli pisariaqartigaaq meeraanermi toqqissimasumik perioriartornissaq. Ukiut siullit marluk unammilligassarput annerpaaq tassaavoq meeqlanik sumiginnaasarneq. Tamatumani meeqlanut inuuusuttuaqqanullu periusissiaq ingerlasoq nanginnejartariaqarpoq. Meeqlerisut sineriak tamakkerlugu annertusaavagineqartariaqarput, naartuunermiit perornissap tungaanut isumagineqarluarnissaq pingaaqaaq. Taamaammat aamma peqqinnissaqarfimmi juumooqarneq qimerloorneqartariaqarpoq.

Saaffissaq ulloq unnuarlu ammasoq akeqanngitsoq – oqarasuaatikkut nittartakkakkullu.

Isumaqpugut pisariaqartoq, taanna nittartakkamut atassutilerneqartariaqarpoq. Inuunermi atukkanut tunngasunik aperisoqarnissaanut periarfissiisumik. Isorliunerusuni najungaqtut immikkut periusissiami taaneqartut, saaffiginninnissaminut allatulli periarfissagissaartariaqarput. Pilersitassat taakku kommunit suleqatigalugit ilusilersorneqartariaqarput.

Qanigisaasut – nalaatartoqartillugu isumagineqartariaqarput.

Iilloqarfimmi nunaqarfimmi piareersimasoqassaaq nalaataqartoqartillugu qisuariapallattartunik, imminortoqartillugu ikorfartuisussanik. Ilinniartut siunnersorneqartarerat ilinniartitaanerullu peqatigisaanik eqqarsartaatsikkut misigissutsitigull ikiorserneqarsinnaanerisa inerisarneqarnerat pitsaaqaaq, atorluaqqunarpoq.

Pisortat aaqqissuussamik iliuuseqarnerisa saniatigut, inuttut aamma nukittussuseqarnerput atorluarniartigu.

Inuttut qanigisagut, ikinngutigut kammalaatigut ilaquittagullu attavigilluartariaqarpagut, taakkummata inuunitsinnut malinnaasut nukittorsaasullu. Naalakkersuisut oqarput takorloortsik, periusissiaq una sumiiffinni tamani aalajangersimasunik iliuutsinut piviusunngortinnejassasoq. Taakku assut oqaloqataaffigerusunnarput.

Inoqarfii tamarmik pinaveersaartitsinermut ataatsimiitalit qitiusutut suleqataasariaqarput. Piitsuussuseq toqqaannartumik aamma inuunermut nuannersumut ingerlatsinissamut innarliisusoq takoqqipparput, Kingullermik nalunaarusiaq saqqummermat. Taamaammat piitsuussuseq nukiit tamaasa atorlugit akiorniartigu, kiisalu inuiaqatigiittut eqqartorlugu – qanoq pitsaanerpaamik ikorsiinerit sunniuteqarsinnaanersut, maannalu iliuutsit ilumut naammaginarnersut. Isumarput malillugu naammaginanngillat.

Meeqqat sms-ikkut aperiffissaqalernerat alloriarneruvoq pitsaasoq, tamatumani lu Meeqlanut Inuuusuttuaqqanullu Oqaloqatiginnittarfik, MIO suliaqarpoq pitsaasunik tapersersukkatsinnik.

Palasittaq oqaluffiup avataatigut naatsorsuutigineqarsinnaaneri annertusaavagineqarsinnaasoraarput, taakkummata tarnikkut nukittorsaasut upperisamillu aallaavilimmik inuunerup naleqangaassusaanik oqariartortut nukittorsaasullu.

Embrace Life Council

Canada-mi Nunavut-mi inuunerup erlinnartuuneranik aallaaveqartumik suliniaqatigiiffeqarpoq, suliniutinik assigiinngitsunik aallarnisaasartunik. Nunatsinni isumaqarpugut taamaattumik atorfissaqartitsisugut.

Uani suliassaqarfimmi eqqarsartariaqarpugut, suut tamarmik imminnut ataqqatigiittut. Imigassamik atornerluisuuneq, ikiarooraajuttuuneq, persuttaasarnerit, kinguaassiutitigut atornerluisarnerit – akuersaanngisagut uunga sammisamut attuumassuteqarput. Taamaattumik iliuutsit suliassaqarfii akimorlugit ingerlanneqartariaqarput. Maannamut iliuutsit ajoraluwartumik naammangillat. Tamatta peqataasariaqalerpugut, immitsinnuinnaq isumaginata, nunaqqatigut aamma isumagisigit.

Neriuutigaarput aamma upperaarput siunissami inuuneq nunatsinni nuannersuussasoq, paqumisuffiunngitsoq, nuannaarfiusoq, illarfiusoq, kinguaassiorfiusoq nukittooq – tamanut inissaqartitsisoq.

Piffissaq Kingulleq meeqqat pisinnaatitaaffii pillugit, kattuffiit soqutigisaqaqatigiiffiillu soorlu "Meeqqat Inuunerissut" suliaqarnerat nersualaarusupparput, kiisalu 'NILLIASA' persuttaasarneq pillugu akiuiniarlutik nikussaaqatigiittut torrallaapput. Suli nukiit pisariaqarteqaagut – qujanarlu.

Periusissiaq saqqummiunneqartoq alloriaqqinnissanut tullernut aallartiffiulluarpoq, kissaatigaarput ilaqtu. Ataatsimiitaliaq kiisalu Naalakkersuisut periusissiamut immersoqatigiissasut. Taamaattumik ataatsimiitaliamut innersuullugu suliassanngortipparput.